

## 992.

*ohne Datierung****Nickel Apt bekennt eine Schuld und verpfändet einen Garten.***

*fol. 184r* <sup>a)</sup>Nickel Apt hat bekanth, daz er schuldig sey und von Stuwirirs kinde eyn genomen hat 20 ß gr nach alder wer ye 15 heller vor eyn groschin. Da vor hat er òm czu phande eyn gesaczt und benümet seyn garten vor dem Obirthor, der seyn weip von irem vater an kommen ist und er auch widir synen swager gekaufft hat. Wenne daz kinth seyn gelt haben, daz er om daz uszrichten will. Ab er daz nicht tete, so sal sulcher garte seyn phant seyn, ab dem kinde nicht bezalung gesche, daz er sich sulcher schuld vor ydirmenlichen irholen sal.

*a) alles durchgestrichen*

## 993.

*1454 Juni 17****Reynold von Schönfeld übergibt der Stadt einen Quittbrief.***

*fol. 184v* Actum 2<sup>a</sup> feria post Trinitatis anno domini etc. LIIII hat der veste Reynold von Schonfels eynen quit brieff vor uns bracht, dorin sich heldit als hirnach geschr(ieben) stet.

Ich Sigmund von Schönfels bekenne mit dieszen brieffe und thu kunth allen dy òn sehen addir horen leszen, daz dy gestrengen und vesten Peter von Wolffisdorff doselbinst gesessen und Kuncz von Wolffisdorff czu Druncz<sup>1)</sup> gesessen meyne burgen gewest sint vor den gestrengen Reynolde von Schonfels, meynen brudir. Sulchir burgeschafft und globde sage ich sy quid ledig und losz in crafft und mit urkunde dicz brieffes. Dobey ist gewest der gestrengte und veste rittir er Hans von Kokericz czur Dobir<sup>2)</sup> gesessen, meyn libir swehir, Hans von Kokericz czu Drewke<sup>3)</sup> gesessen, meyn libir swagir, und Paul von Weispach, meyn libir òhem. Des habe ich gebeten den gestrengen und erinvesten Hanszen von Kokericz, meyner genedigen frauwen von Sachszen hoffemeister, czu bekenthnuscz seyn insigil unschedinlich ym und seyn erben und gebrechin halben des meynen an dieszen brieff czu drugken, der gegeben ist nach Christi geburt XIII<sup>C</sup> dornach in dem<sup>a)</sup> LIII jar am dinstag nach Michaelis.

Sulchen brieff Peter von Wolffisdorff und Kuncz von Wolfframs Dorf uffgenommen und Reynolde der vorsaczung losz gesagit haben.

*a) folgt durchgestrichen drey und 1) Trünzig 2) Dober b. Sagan i. Schlesien 3) Drebkau b. Kalau*